

## An tír ina cíor thuathail

### Ceist 1

Beidh tú ag féachaint ar ball ar tuairisc faoi mhíshocracht ar Shráid Laighean inniu. An dtuigeann tú na focail seo a bheidh sa tuairisc?

éiginnteacht	léirsitheoirí	Comhaontas Glas
sceitimíní	olltoghchán	
neamhspleách	go hiondúil	talamh slán

### Ceist 2

Anois féach ar an tuairisc agus líon na bearnaí sa bhosca (a) leis an pháirtí ceart polaitíochta a bhaineann le gach ainm agus (b) le pointe amháin eolais faoin duine sin.

<i>An duine</i>	<i>An Páirtí Polaitíochta</i>	<i>Eolas</i>
Aengus Ó Snodaigh		
James Reilly		
Eamon Gilmore		
Thomas Byrne		

### Ceist 3

'...san aer...'

(a) Míneigh na difríochtaí idir na samplaí seo:

san uisce      sa bhaile mór      in uisce      i mbaile mór

(b) Roghnaigh an réamhfhocal ceart (i / in / sa / san) le cur sna habairtí seo:

1. Chuir mo mháthair an fheoil a bhí fágtha \_\_\_\_\_ chuisneoir.
2. Beidh an dioscó ar siúl oíche Shathairn \_\_\_\_\_ chlub sóisialta.
3. Ní cheannóinn aon rud \_\_\_\_\_ siopa mar sin.
4. Is breá liom a bheith ag siúl ar na sléibhte \_\_\_\_\_ Fhómhar.
5. D'fhág mé mo mhála scoile \_\_\_\_\_ bhaile inniu.
6. Tá sí ina cónaí \_\_\_\_\_ árasán \_\_\_\_\_ gcathair bheag \_\_\_\_\_ Spáinn.

**Ceist 4**

Cuir an focal ‘mí’ roimh mhíonna na bliana. Bí cúramach, áfach, mar tagann athrú ar chuid de na míonna tar éis an fhocail seo.

Eanáir \_\_\_\_\_  
Feabhra \_\_\_\_\_  
Márta \_\_\_\_\_  
Aibreán \_\_\_\_\_  
Bealtaine \_\_\_\_\_  
Meitheamh \_\_\_\_\_  
Iúil \_\_\_\_\_  
Lúnasa \_\_\_\_\_  
Meán Fómhair \_\_\_\_\_  
Deireadh Fómhair \_\_\_\_\_  
Samhain \_\_\_\_\_  
Nollaig \_\_\_\_\_

**Ceist 5**

Roghnaigh an forainm réamhfhoclach cuí a oireann do na nathanna cainte:

leis	uainn	faoi
léi	asam	air

- Tá mé in éad \_\_\_\_\_.
- Bhí muinín aige \_\_\_\_\_.
- Theip \_\_\_\_\_ sa scrúdú.
- D'éirigh go maith \_\_\_\_\_ sa scrúdú tiomána.
- Tá airgead ag teastáil \_\_\_\_\_.
- Tá a lán cloiste agam \_\_\_\_\_.

**Ceist 6**

Pléigh na ceisteanna seo leis an duine in aice leat nó le do ghrúpa:

Cén fáth a bhfuil muintir na hÉireann an-mhíshásta faoi láthair?  
Ar cheart don rialtas éirí as, dar leat? Cén fáth?  
An síleann tú go bhfuil Brian Cowen ina Thaoiseach maith?

## Treoracha agus Freagraí

### Ceist 1

Tá an cheist seo le déanamh sula seinntear an tuairisc.

éiginnteacht – *uncertainty*

léirsitheoirí – *demonstrators*

Comhaontas Glas – *Green Party*

sceitimíní – *excitement*

olltoghchán – *general election*

neamhspleách – *independent*

go hiondúil – *usually*

talamh slán a dhéanamh de rud – *to assume*

### Ceist 2

<i>An duine</i>	<i>An Páirtí Polaitíochta</i>	<i>Eolas</i>
Aengus Ó Snodaigh	Sinn Féin	Síleann sé gur cheart don Chomhaontas Glas toghchán a éileamh anois má tá muinín cailte acu as an rialtas.
James Reilly	TD, Fine Gael	Deir sé gur cheart don Taoiseach dul go dtí Áras an Uachtaráin agus éirí as.
Eamon Gilmore	TD, Lucht Oibre	Tá sé den bharúil gur cheart olltoghchán a bheith ann láithreach.
Thomas Byrne	TD, Fianna Fáil	Cé go bhfuil meas aige ar an Taoiseach, tuigeann sé go bhfuil deacrachtaí ag an phobal leis agus beidh na nithe sin á bplé i gcruinniú sa Pharlaimint amárach.

### Ceist 3

(a)

san uisce – in **the** water ('n' roimh ghuta)

sa bhaile mór – in **the** town

in uisce – in water ('n' roimh ghuta)

i mbaile mór – in **a** town

(b)

1. Chuir mo mháthair an fheoil a bhí fágtha **sa** chuisneoir.
2. Beidh an dioscó ar siúl oíche Shathairn **sa** chlub sóisialta.
3. Ní cheannóinn aon rud **i** siopa mar sin.
4. Is breá liom a bheith ag siúl ar na sléibhte **san** Fhómhar.
5. D'fhág mé mo mhála scoile **sa** bhaile inniu.
6. Tá sí ina cónaí **in** árasán **i** gcathair bheag **sa** Spáinn.

#### Ceist 4

Mí Eanáir  
Mí Feabhra  
Mí an Mhárta nó Mí na Márta  
Mí Aibreáin  
Mí na Bealtaine  
Mí an Mheithimh  
Mí Iúil  
Mí Lúnasa  
Mí Mheán Fómhair  
Mí Dheireadh Fómhair  
Mí na Samhna  
Mí na Nollag

#### Ceist 5

- Tá mé in éad **léi**.
- Bhí muinín aige **asam**.
- Theip **air** sa scrúdú.
- D'éirigh go maith **leis** sa scrúdú tiomána.
- Tá airgead ag teastáil **uainn**.
- Tá a lán cloiste agam **faoi**.

#### Ceist 6

Is féidir gach beirt a chur ag déanamh an phlé seo agus ansin na ceisteanna a phlé leis an rang iomlán.

### **Sorcha Ní Riada**

Bhí éiginnteacht le brath san aer i dTeach Laighean an tráthnóna ar fad agus an eachtra seo le léirsitheoirí ó Shinn Féin ag Tithe an Rialtais ag cur leis na sceitimíní. Níorbh fhada gur tháinig an freasúra amach ag lorg olltoghcháin gan mhoill i bhfianaise an méid a bhí le rá ag an gComhaontas Glas níos luaithe.

### **Aengus Ó Snodaigh, Sinn Féin**

Measaim go bhfuil sé seafóideach go hiomlán go bhfuil na Glasaigh ag fanacht go dtí Mí Eanáir. Má tá muinín cailte acu sa rialtas ba chóir go mbeadh an toghchán anois.

### **James Reilly, TD, Fine Gael**

Tá olltoghchán ag teastáil uainn agus ba cheart don Taoiseach dul go dtí an tÁras<sup>i</sup> (Áras an Uachtaráin) agus éirí as.

### **Eamon Gilmore, TD, An Lucht Oibre**

Agus, i mo thuairim féin ba cheart go mbeadh an t-olltoghchán<sup>ii</sup> sin againn láithreach.

### **Sorcha Ní Riada**

Ardaíodh ceisteanna, leis, faoi cheannaireacht Brian Cowen ar Fhianna Fáil.

### **Thomas Byrne, TD, Fianna Fáil**

Tá a lán díomá ar a lán daoine. Measaim féin go bhfuil Brian Cowen . . . *eh*. . . is fear an-deas<sup>iii</sup> é agus is fear é a oibríonn go cruá agus níl aon deacrachtaí agamsa le Brian Cowen. Ach, is soiléir go bhfuil deacrachtaí ag an bpobal, agus measaim go mbeidh na rudaí seo, go mbeidh muid ag caint faoi na rudaí seo ag an gcuinníú den Pháirtí Parlaiminte amárach.

Sorcha Ní Riada, Nuacht TG4, Baile Átha Cliath.

### **Eimear Ní Chonaola**

Níos luaithe, dúirt an bheirt Teachtaí Dála neamhspleácha a thugann tacaíocht don rialtas go hiondúil, Michael Lowry agus Jackie Healy Rae nach bhféadfadh an rialtas talamh slán a dhéanamh dá vótaí siúd níos mó. Agus, dúirt an tIar-Aire Rialtais Willie O’Dea nach gcuirfeadh sé aon iontas air dá mbeadh olltoghchán ann níos túsce ná Mí Eanáir.

---

<sup>i</sup> *an áras* a deirtear

<sup>ii</sup> *an olltoghchán* a deirtear

<sup>iii</sup> *ana-dheas* a deirtear i gcanúint na Mumhan